

Ken ta... Imelda de Cuba

Como cu e luna di Mei nos ta celebra dia di mama, nos a dicidi di conta algo tocante un "Mama" hopi special pa CHABALITO, e mama di CHABALITO, Imelda de Cuba.

Su nomber no ta conoci, pasobra semper el a prefera di keda den 'background', pero ta hopi mucha ta cord'é, muchanan cu awendia ta hendenan grandi, cu ta traha y tin nan mesun famia. Pakiko nan lo ta cord'é?

Tante Imelda (of Mechi manera nan ta jam'é) a nace dia 8 di September, 1941, y ta e ruman mas chikito di un famia di 8 jiu. Nan tabata biba na e cas na skina den Wilheminastraat, unda awor tin un edificio grandi berde, net pa'bao di Elmar.

Despues di a caba su MULO (middelbare school di e tempo ey), Mechi a dicidi di bai studia na Leiden, Hulanda como analiste. Na 1961 el a regresa Aruba, y a cuminsa traha na laboratorium. Pero a kita tempo cu el a casa, y a dicidi e ora ey pa bai traha na un agencia di publicidad, unda el a siña henter un otro trabao, pero cu si el a gusta, como cu e tabata tin di haber cu pintamento, cu ta algo cu e gusta hopi.

Na 1964 el a haya su prome jiu, y despues a sigui 3 mas. Dos jiu muher y dos jiu homber. Pero e ta un hende cu kier a haci hopi mas, y na aña 1976, el a cuminsa cu un show special pa mucha yamá Matinette. El a cuminsa train mucha pa balia, canta, declama, etc. Su cas semper tabata yen di mucha cu ta bin train pa e show cu tabata wordo grabá tur diasabra mainta na Tele-Aruba. Fuera di tabata train mucha, e tabata traha preguntanan y bin cu ideanan nobo pa e muchanan cu ta bin representa nan scol tur siman pa competi y gana premionan, tambe e tabata pinta tur e decoracion pa e show di e siman ey. Tur


esaki, mas traha na un agencia di publicidad. Pues su siman tabata hopi druk. Awendia bida ta difícil, ora tin di combina trabao y jiu, wel Mechi a traha, lanta 4 jiu hunto cu su casá Eddy, y produci, dirigi y coordina tur dia como 15 mucha pa un show di tur siman. Despues di 5 aña, el a dicidi di stop cu e show. Pero e no a tarda pa bolbe cu Matinette, pero e biaha aki den otro forma, esta den un revista pa mucha. Esaki a wordo publica pa prome biaha na September di 1984. Y e acohida tabata hopi bon. Muchanan a gusta e revista y algun por corda ainda con dushi tabata ora di ricibi nan Matinette. E revista a existi pa 12 aña largo, y a dicidi cu e momento a yega pa e retira, y cuminsa goza di e nietonan cu a cuminsa drenta su bida e momentonan ey. Matinette e ora ey a sigui existi, pero bao maneho di otro hende.

Pero atrobe Mechi no tabata por a sinta keto. Y na 1998, despues di 2 aña so, el a cuminsa cu e revista aki, CHABALITO, unda el a ocupa su mes na principio cu henter e parti di ilustracion y redaccion. Pero aworaki ta ocupa su mes mas tanto cu ilustracion, y tur luna ta sinta na su mesa cu su kwashi den man ta pinta e kaft, Malva y Gala, Gino, ta traha e crucigrama y kruiswoordpuzzel, y mucho mas.

Ta hopi mas cos nos por conta, pero un cos ta sigur: Mechi a traha henter su bida, te awe ainda, y no tin ningun intencion di retira, pero ta haci e trabao cu hopi amor y dedicacion. Y ta cu e mesun dedicacion cu el a traha y lanta su jiunan, el a traha pa su otro 'jiunan', esta Matinette y CHABALITO, y tur e muchanan cu el a entretene durante añanan largo.



1.



2.

1. Imelda de Cuba, of Mechi.
2. Na edad di 4 aña ya e ta mustrando determinacion.
3. Aki e ta relahando den compania di dos di su nietonan.



3.

CAMPAÑA DI NUTRICIA

Bokier sa con pa gana?

Facil! Djies pinta e 'kleurplaat' riba pagina 18 di bo CHABALITO, usando hopi creatividad, y entrega esaki prome cu 15 di Mei na Lenor NV

1e premio: **Afl. 150,-**

2o premio: **Afl. 100,-**

Lo bai tin dos categoria: Un categoria ta pa muchanan di 4 pa 8 aña. Y e otro categoria ta pa muchanan di 9 pa 13 aña. Cada categoria lo tin e mesun premionan.
E fecha di e sorteo ta dia 15 di Mei, 2004, y NO dia 30 di April. Tene bon cuenta.



ta



Chabalito

Number 7 - Año VI - Afl. 2,=



leh
03/04

BIBLIOTECA NACIONAL ARUBA



3 0993 00078 004 9